

Especialmente cerca personanan clave den comunidad

MASONERIA TA CONOCE UN CRECIMIENTO FUERTE NA ARUBA

Secretaria total ta pone cu solamente miembronan conoce nan relacion personal interno

ORANJESTAD (AAN): Den pasado masoneria tabata un practica prohibi na hopi pais pasobra e tabata tin aspectonan, cu tabata parce peligroso pa e paisnan y nan sistema di funciona. Despues di tempo Masoneria a perde atencion pero esey no ta significa cu el a stop di existi. Informenan cu **DIARIO** a copia ta muestra cu Masoneria na Aruba ta mas fuerte cu nunca y cu su miembronan ta postula na diferente posicionnan clave. Un reclutacion activo di miembronan ta tuma lugar na e momentonan aki, mientras ningun hende di pafor sa kico ta socede tras di e murayanan di masoneria ya cu tur cos ta secreto y hasta e relacionnan entre miembronan ta secreto.

Masoneria a worde introduci na Francia y ta for di su nomber Frances, Masoneria debe su nomber. El a worde lanta como un union di metsla cu a uni den un fraternidad secreto den cual ningun hende di pafor tin entrada. Un persona cu bay forma parti di masoneria, mester pasa den diferente etapa y mas halto e yega mas e lo descubri di e secretonan di e sistema.

Ritonan, simbolismo y secrecia entorno masoneria a pone cu e loke nan ta yama "secta secreto" aki a worde rechaza na hopi pais. Sinem-

bargo tabata tin paisnan, caminda e sistema aki a haya poder di gobernacion manera na Portugal durante e promer parti di Siglo 20, tempo cu opresion di pensamentonan sano di e pais a tuma lugar.

ORGANISACION SECRETO CU FRATERNIDAD SECRETO

Loke ta sali dilanti den Masoneria ta, cu e ta un union di hende cu ta yama nan mes Liber di tur sistema comun rond di nan. Nan alianza ta na

promer lugar cu e sistema Masonico, cu ta percura tambe pa nan bienestar personal. Miembronan di masoneria generalmente ta haya asistencia di otro atravez di un fraternidad sumamente secreto, pero cu ta haci cu miembronan di Masoneria ta progresa financieramente y ta ocupa lugarnan cu nan kier ocupa.

E hecho cu Masonnan ta yuda otro, a atrae hopi hende cu kier a bula for di problema. E promesa cu atravez di e fraternidad nan lo progresa, a haci hopi hende cu generalmente no ta mucho inclina pa asuntunan misterioso, dicidi pa Masoneria.

Pakico e miembronan semper ta yuda otro y kico e obhetivo di e yudanza na otro aki ta encera, ta parti di e secretonan cu publico no ta haya sa. Tampoco publico nunca a logra haya sa si e Masoneria conoce un sistema cu ta permitie yuda su miembronan escala na cierto altura pa asina nan por sirbi Masoneria.

ACEPTACION A REEMPLAZA CUESTIONAMENTO DI SECRECIA

Un persona cu drenta Masoneria ta mara pa resto di su bida na e sistema den cual e por crece dor di obedecer estrictamente na loke e sistema ta dicta. Ta pa motibo di e fraternidad secreto y e forma con miembronan di Masoneria ta mara na nan organizacion, generalmente hendenan tin miedo di mishi cu Masoneria pasobra ta existi e temor cu Masoneria por dal back na forma pisa.

Den pasado tabata vigila pasonan di Masoneria pero despues e vigilancia aki a bira menos estricto y tolerancia a bira aceptacion total. Un motibo pa esaki tabata cu na cierto islanan den Caribe nan a cuminsa cu organizacionnan pa entiero di hende y a yama e institucionnan aki tambe Lodge, cu anteriormente tabata e nomber di gruponan di Masonnan. Asina a e asunto a bruha pasobra lo tin Lodge di Mason y Lodgenan di entiero.

Na Aruba, Masoneria a conoce un progreso rapido. Miembronan activo di Masoneria ta recluta miembronan nobo y den e proceso aki ta splica candidatonan pa drenta Masoneria cu ta storia a worde conta encuanto e organizacion y cu pesey tin tanto reserva contra Masonnan. Tambe esnan cu ta worde acerca pa drenta Masoneria ta worde muestra cu unavez cu nan ta miembro di e organizacion nan ta haya solucion pa nan problemanan y cu nan ta haya experencianan nobo pa bira mas fuerte como persona.

MASONERIA CRECIENDO RAPIDAMENTE NA ARUBA

Miembronan di organizacionnan masonico lo ta plama rond Aruba y ta ocupa posicionnan importante. Con nan relacion cu otro ta atravez di e organizacion cu tur ta sirbi hunto, ta keda un secreto cu mester bay dera hunto cu cada miembro di Masoneria cu muri. Ni nan miembronan di familia mes por bay cuestiona nan participacion den Masoneria y mester keda for di e organizacion.

Aparentemente Aruba a bira un centro pa Masoneria y for di Aruba contacto ta worde manteni cu diferente organizacionnan den e region, manera Venezuela. Miembronan importante di Masoneria lo ta viaha cu regularidad pa Venezuela pa atende reunionnan di peso di e organizacion.

Un tempo Masoneria tabata worde contraresta dor di Iglesia Catolico entre otro. E actitud severo di Iglesia Catolico enfrente Masonnan a traha lugar pa tolerancia y lo a yega asina leo cu hendenan cu ta activo den seno di Iglesia Catolico (cu ta e religion cu mas miembro na Aruba) pero tambe den otro Iglesias, ta miembronan importante di e secta secreto di Masonnan.

E crecimiento di Masoneria ta worde atribui na e hecho cu comunidatnan rond mundo a stop di cuestiona kico por tin tras di un organi-

sacion asina secreto, pero cu semper a boga pa "libertad" for di tur sistemanan, gobernacion, regimennan, etc. Ta esaki tabata e surgimento di Mason: liber di sistemanan comun di gobernacion, religion, reynan, etc. Masoneria ta un mundo cu su propio reglanan y normanan.

UN ESTADO SECRETO DEN COMUNIDAD

"Masoneria no tin nada malo su tras," ta loke ta worde splica na publico. Pero hecho ta keda cu miembronan di Masoneria ta ocupando mas y mas funcion importante den comunidad y cu miembronan di Masoneria ta haci carera rapido ariba terenonan importante y ta worde sosteni dor di e totalidad di e organizacion cu nan na nan turno mester sirbipa asina Masoneria por sigui prospera. Loke Masoneria ta realmente, ta "Masonnan so sa." Pa publico ta keda un secreto, pa semper desconoci aunke e ta forma parti di comunidad.

Nunca publico lo haya sa tampoco con Masoneria ta mantene tur su miembronan pa semper bao su custodia, sin cu nunca ta scucha un voz critico contra e organizacion manera ta pasa cu tur organizacion. Nunca publico a haya sa pakico ningun hende por mishi cu Masoneria y pakico tin tanto tolerancia cu un sistema, cu ta un estado dentro di un estado cu mester opera cu secrecia total pa e pais caminda e ta desaroya.

Den un mundo di tanto hende inteligente nunca e pregunta ta worde haci pakico mester tin tanto misterio y kico e fundeshi, normanan y valornan mescos cu e ritonan secreto, reunionnan secreto y simbolismo di masoneria ta contene!

Publico ta parece ciego y sordo pa e organizacionnan di Masoneria, cu ta worde forma pa hendenan di kende ta poco dificil pa acepta normalmente cu nan tambe lo bay participa na bistimento di handschoen cu trahe especial pa bay reunion y cu nan tambe lo bay participa na un mundo asina oculto.